

Aruba a perde un baluarte, señor John Hart

A kaba di drente e tristo noticia cu John Hart a bai sosegá na edad di 85 aña despues di algun tempo cu e tawata malo. John Hart su mayorman ta Boneriano y e a nace 9 juni 1930 na Brooklyn, New York. Despues di a biba algun tempo na Merca su mayor nan hunto cu su otro ruman a bai biba na Bonaire. Na edad relativamente hoben John a bai imigra na Aruba pa un miho futuro. Na april 1947 John a cuminsa traha den departamento marítimo na LAGO. Na augustus aña 1954 John a drenta enlase matrimonial cu Rosana Adela Alders y for di matrimonio a nace ses Yiu. Den e mes un aña aki John tawata co-fundador di Petroleum Workers Federation of Aruba. John a wordu nombra como secretario di sindicato nobo. Como miembro di sindicato John a atende diferente Leadership training y cursonan den exterior cu a dune expertisio nan den su carera profesional.

Despues di traha un tempo na Lago John a scohe pa bai traha na aña 1961 den gobierno den caso aki na John a cuminsa traha na Huis van bewaring. Pero semper tawata tin pasion sindical y John tawata sinti cu mester a bin cu un sindicato pa defende clase trahado cu tawata traha den sector hotelero na Aruba y pesey na aña 1963 a funda un sindicato nobo cu a jama e tempo ey Hotel Workers Union. John a wordu nombra presidente di dicho sindicato. Durante cu John tawata presidente la atende, diferente seminario,

leadership training na Brazil, Colombia, Mexico, Trinidad y Corsow. E fundeshi pa logra derechonan pa trahadonan den sector hotelero a wordu establese despues cu a lanta sindicato Hotel Workers Union. John tawata un persona hopi activo na Aruba y semper tawata disponible pa contribui pa comunidad. Na aña 1964 John a wordu nombra secretario general di SAC.

Na aña 1965 John a wordu nombra penningmeester di un stichting cu a jama "Saint Vincent de Paul Society" pa juda recauda fondo nan pa muchanan menos afortuna den San Nicolaas. Tambe John tawata den bestuur tanto na Bonaire club y Orquidia club. John tawata manager di e banda The Strangers.

Na aña 1969 como presidente di sindicato John a participa durante e situacion dificil 30 mei na Corsow pa juda jega na un solucion entre trahado y dunador di trabao. Na aña 1971 John a wordu nombra vice president di SAC. Ela ocupa e funcion aki pa 28 aña largo.

Na aña 1974 John tawata Presidente di General Worker Union y durante cu John tawata president la atende seminario di top leadership na Barbados, tambe congreso di Caribbean Trade & Tourism Association na Puerto Rico, Bogota. Den e

mesun aña aki John a wordu nombra miembro di SER di Antias.

John tawata un persona cu a dedica tempo pa juda clase trahadonan y negocia e miho contractonan colectivo na fabor di trahador. Na aña 1974 John a wordu apunta como miembro di comision di referendum pa juda organiza referendum cu a tuma lugar 25 maart 1977 na Aruba. John tawata miembro di social Economische raad, forma door di gobierno di Antias. Como miembro di SER John a forma parti di diferente mission di Antias cu a biaha e.o pa Venezuela y Hulanda pa atende reunionnan riba asunto economico.

Na aña 1976, 18 maart,

un dia historico cu Aruba a inaugura su himno y bandera na Wilhelmina stadion, John como presidente di sindicato a wordu invita door di Betico Croes q.p.d. a duna un discurso riba e importancia pa un pais tin su himno y bandera.

Na juli 1981 John a wordu nombra director di Huis van bewaring y tawata engarga cu maneho di e prison te ora cu la bai cu pensioen. Dia 2 april 1985 John a ricibi medaya di condecoracion di Ridder van Orde van Oranje Nassau den nomber di La Reina. Como aprecio di a contribui activamente den comunidad di Aruba.

Despues di 29 anja den servicio di gobierno na aña 1989 John a bai cu pensioen bon meresi.

Prome cu John a bai cu pensioen la coordina e proyecto di construccion di KIA y su ultimo responsabilidad tawata pa acomoda e personal y presonan na KIA. Banda di su carera profesional John tawata un tata ehemplar pa su famia cu semper tawata cla pa juda su yuinan. John a didika su bida despues cu la bai cu pensioen pa sirbi Dios den Iglesia Emmanuel na Dakota hunto cu Pastor Gilbert Martes.

John tawata un persona cu a didika su bida pa su pais stima Aruba.

Comunidad Arubano a perde un gran baluarte. Hopi forsa e dlanan aki na famia Hart y cu John sosega na paz den reino di Señor.

